

0 10 20 30 40 50 60 70 80 90 100 110 120 130 140 150 160 170 180

Inches

Centimetres

Blue

Cyan

Green

Yellow

Red


Magenta

White

3/C

Kodak Color Control Patches

傳 600.5
895
2



傳 61
865

晉陶靖節年譜

山陽丁晏編

梁蕭統撰陶淵明傳敘次時事前後錯迕史家因之轉相承譌宋王質紹陶錄有栗里年譜明陶宗儀輟耕錄備載之編次甚疎頗有謬誤怨詩弱冠逢世阻始室喪其偏謂弱冠始喪妻室失耦則爲偏非必妾也舊譜謂二十喪妾凡說無據其謬一也宋書檀韶爲江州刺史在義熙十二年請周續之祖企謝景夷三人在城北講禮陶詩所云周生述孔業祖謝響然臻是也舊譜誤繫之永初元年其謬二也宋書王宏爲江州在義熙十四年而舊譜繫王休元於元熙元年移下一年其謬三也宋書檀道濟爲江州在

景平二年是歲甲子而舊譜繫道濟於元嘉三年丙寅與正史不合其謬四也蜀張續又謂淵明生於壬子尤誤攷之正史靖節卒於元嘉四年年六十三逆推其生年當晉哀帝興寧三年是歲乙丑非壬子也余嘗依据本集參稽史文立為斯譜不敢沿襲前人貽誤來哲後之覽者幸詳正焉其詩文之可系年者則分系之它無年月者亦不敢虛造妄測強繫歲年其所不知蓋闕如也

晉哀帝興寧三年乙丑 一歲 昭明太子傳陶淵明字

元亮或云潛字淵明潯陽柴桑人也

張續辨證云義熙中祭程氏妹稱淵

明至元嘉中對檀道濟曰潛也何敢望賢在晉名淵明在宋名潛

晉書隱逸傳大司

馬侃曾孫祖茂武昌太守 陶茂麟家譜祖岱父佚其

名姿城太守 案祖茂見於正史此作岱非也姿城於

地志無攷家譜不足據也 自述世系有命子詩於皇

仁考澹焉虛止寄迹風雲寘茲愠喜俾其父之美也又

有贈長沙公詩序長沙公於余為族祖同出大司馬

帝時陶舍晉書載長沙公侃卒此序長沙乃侃之後裔襲爵

也 陶集孟嘉傳娶大司馬長沙桓公陶侃第十女又

云淵明先親君之第四女也凱風寒泉之思實鍾厥心

案此則靖節之母孟氏征西大將軍長史孟嘉女也

海西公太和元年丙寅 二歲

太和二年丁卯 三歲

太和三年戊辰 四歲

太和四年己巳 五歲

太和五年庚午 六歲

簡文帝咸安元年辛未 七歲

咸安二年壬申 八歲

孝武帝寧康元年癸酉 九歲

寧康二年甲戌 十歲

寧康三年乙亥 十一歲

太元元年丙子 十二歲

太元二年丁丑 十三歲

太元三年戊寅 十四歲

太元四年己卯 十五歲

太元五年庚辰 十六歲

太元六年辛巳 十七歲

太元七年壬午 十八歲

太元八年癸未 十九歲

太元九年甲申 二十歲 是時喪妻怨詩弱冠逢世阻

始室喪其偏

太元十年乙酉 二十一歲

初

三

太元十一年丙戌 二十二歲

太元十二年丁亥 二十三歲

太元十三年戊子 二十四歲

太元十四年己丑 二十五歲

太元十五年庚寅 二十六歲

太元十六年辛卯 二十七歲

太元十七年壬辰 二十八歲

太元十八年癸巳 二十九歲 南史親老家貧起為州

祭酒不堪吏職少日自解而歸州召主簿不就 案陶

集癸巳為江州祭酒史無明文姑系於此

太元十九年甲午 三十歲

太元二十年乙未 三十一歲

太元二十一年丙申 三十二歲

安帝隆安元年丁酉 三十三歲

隆安二年戊戌 三十四歲

隆安三年己亥 三十五歲

隆安四年庚子 三十六歲 始作鎮軍叅軍經曲阿五

月中從都還阻風於規林

隆安五年辛丑 三十七歲 遊斜川序辛丑正月五日

詩開歲倏五日一本誤作五十或据以編年失之七月

赴假還江陵詩閒居三十載是年三十七歲舉成數言三十載 祭程氏妹文昔在江陵重罹天罰伊我與爾百哀是切黯黯高雲淒淒冬月感惟崩號與言泣血粟里舊譜謂是失父

元興元年壬寅 三十八歲

元興二年癸卯 三十九歲 始春懷古田舍詩十二月

與從弟敬遠詩

元興三年甲辰 四十歲 榮木詩四十無聞斯不足畏

又連雨獨飲詩儻仰四十年

義熙元年乙巳 四十一歲 三月為建威參軍使都經

錢溪詩

南史後為鎮軍建威參軍謂親朋曰聊欲絃

歌以為三徑之資可乎執事者聞之以為彭澤令公田

悉令吏種秫稻妻子固請種粳乃使二頃五十畝種秫

五十畝種粳郡遣督郵至縣吏白應束帶見之潛歎曰

我不能為五斗米折腰向鄉里小人即日解印綬去職

賦歸去來以遂其志 歸去來辭序仲秋至冬在官八

十餘日乙巳歲十一月也

序當乙巳年晉書作義熙三年誤

有歸田園

居詩

義熙二年丙午 四十二歲

義熙三年丁未 四十三歲 五月甲辰祭程氏妹文

義熙四年戊申 四十四歲 六月中遇火詩總髮抱孤
念奄出四十年言四十亦舉成數也柴桑舊宅既燬移
居南村有移居詩

義熙五年己酉 四十五歲 九月九日詩

義熙六年庚戌 四十六歲 九月中於西田穫早稻詩

義熙七年辛亥 四十七歲 祭從弟敬遠文歲在辛亥

月惟仲秋 是歲劉裕爲太尉宋書武帝紀與殷晉安別詩

後作太尉叅軍太尉謂裕也

義熙八年壬子 四十八歲

義熙九年癸丑 四十九歲

義熙十年甲寅 五十歲 雜詩昔聞長老言掩耳每不
喜奈何五十年忽已親此事裕將篡晉其勢已成歎其
不幸而親見此事也是年東林寺釋慧遠結白蓮社七
月劉遺民撰同誓文張詮雷次宗宗炳周續之張野等
預焉靖節與遠公爲方外交有酬和劉柴桑詩遺民曾
爲柴桑令 案慧遠結白蓮社在義熙十年社中十八
賢有劉遺民雷次宗諸人是秋七月二十八日遺民撰
同誓文詳見廬山紀略近有蓮社高賢傳妄謂遺民卒
於義熙六年此書隋唐志不著錄晁陳書目皆無之乃
後人僞撰不足據 南史與子書以言其志并爲訓戒

日吾年過五十而窮苦荼毒性剛才拙與物多忤

義熙十一年乙卯 五十一歲

義熙十二年丙辰 五十二歲 昭明太子傳後刺史檀

韶宋書檀韶傳韶為江州刺史在義熙十二年苦請周續之出州與學士祖

企謝景夷三人共在城北講禮加以讐校所住公廨近

於馬隊是故淵明示其詩云周生述孔業祖謝響然臻

馬隊非講肆校書亦已勤 是年劉裕都督中外伐秦

有贈羊長史松齡詩九域甫已一謂裕將滅秦一海內

羊銜使往秦川故有是作 八月中於下濕田舍穫詩

義熙十三年丁巳 五十三歲

義熙十四年戊午 五十四歲 沈約宋書義熙末徵著

作佐郎不就 晉書既絕州郡覲謁其鄉親張野及周

旋人羊松齡寵遵等或有酒邀之或要之共至酒坐雖

不識主人亦欣然無忤酣醉便反未嘗有所造詣所之

唯至田舍及廬山遊觀而已 王宏為撫軍將軍江州

刺史宋書王宏傳是年遷刺史於王撫軍座送客詩 南史潛嘗往

廬山宏令潛故人龐通之齋酒具於半道栗里要之潛

有腳疾使一門生二兒舉籃輿及至欣然便共飲酌俄

頃宏至亦無忤也 是年劉裕弑安帝立恭帝故靖節

不就徵聘桃源之避秦亂殆謂此歟

晉恭帝元熙元年己未 五十五歲 王宏仍在州甚欽

遲之

晉書刺史王宏以元熙中臨州

宋高祖劉裕永初元年庚申 五十六歲 昭明太子傳

自以曾祖晉世宰輔恥復屈身後代自宋高祖王業漸

隆不復肯仕 宋書所著文章皆題其年月義熙以前

則書晉氏年號自永初以來唯云甲子而已

南史

案陶

集義熙以前備書甲子不始於永初也但自永初以後

不書劉宋年號爾

永初二年辛酉 五十七歲 是年恭帝被弑述酒詩山

陽歸下國蓋以魏弑山陽公喻恭帝也飲酒詩以東陵

瓜自喻又以叔夷西山自喻擬古詩飢食首陽薇渴飲

易水流枝條始欲茂忽值山河改皆在晉亡之後讀山

海經詩巨猾肆威暴欽馭違帝旨明明上天鑒為惡不

可履痛斥劉裕故以精衛刑天自喻詠三良荆軻詩亦

當作於此時美昔人從死報仇所以自傷也

永初三年壬戌 五十八歲

宋少帝景平元年癸亥 五十九歲 宋書先是顏延之

為劉柳後軍功曹在尋陽潛與情款後為始安郡

宋書顏延

之傳少帝即位經過日日造潛每往必酣飲致醉臨去

出為始安太守 畱二萬錢與潛潛悉送酒家

宋文帝元嘉元年甲子 六十歲 昭明太子傳江州刺

史檀道濟往候之偃臥瘠餒有日矣宋書少帝紀景平元年江州刺史檀

道濟入朝通鑑道濟為江州在元嘉三年失考道濟謂曰賢者處世天下無道

則隱有道則仕今子生文明之世奈何自苦如此對曰

潛也何敢望賢志不及也道濟饋以梁肉麾而去之

案道濟宋室元勳靖節心鄙之故不受其饋視延之故

人之誼為不侔矣乞食詩當在是時

元嘉二年乙丑 六十一歲

元嘉三年丙寅 六十二歲

元嘉四年丁卯 六十三歲 自祭文歲惟丁卯律中無

射又擬挽歌辭嚴霜九月中送我出遠郊亦在無射之

月靖節之絕筆也文選顏延年陶徵士誄元嘉四年卒

於潯陽昭明太子傳元嘉四年將復徵命會卒時年六

十三世號靖節先生 南史妻翟氏志趣亦同能安苦

節夫耕於前妻鋤於後云子儼俟份佚修五人先是有

責子詩與子儼等疏鎮江柳興恩案梁書安成康王秀

刺史所徵士陶潛曾孫為里司秀歎曰陶唐沈既濟陶

潛之酒豈不可及後世即日辟為西曹峴傳彭澤令孫開元中家於崑山

男壽祺校字

唐陸宣公年譜

山陽丁晏編

唐陸宣公奏議宋紹興二年嵯縣主簿某氏注爲刊本之
最古者凡十五卷不載制誥僅奏議六十二篇注甚簡略
天一閣書目云有箋注不著姓名卽此本也今所傳陸宣
公集二十二卷制誥奏議合刊爲世通行之本新唐書藝
文志陸贄議論表疏集十二卷又翰苑集十卷韋處厚纂
與今卷數正合今所行者未知卽韋氏本否新志類書有
陸贄備舉文言二十卷今已不傳權文公翰苑集序制誥
集十卷奏草七卷中書奏議七卷又有詩文賦別集十五
卷今僅存登春臺東郊朝日月臨鏡湖冬至日陪位聽大

和樂聖人苑中射落飛雁傷望思臺鴻漸七賦曉過南宮
聞樂禁中春松御園芳草三詩別集亦不傳其傳於今者
碩畫昌言具存簡冊卓然經世之文也新書本傳稱贊說
使者五術八計三科四賦六德五要之事今不見於集中
意尙有遺佚歟嘗歎宣公先識之明炯若著蔡論關中事
宜狀憂及將帥之中或竊發郊畿驚犯宮闕未幾而朱泚
之變卒如公言公在咸陽上言慮李懷光併李建徽陽惠
元軍不旬日而懷光果奪兩節度兵竟如公之所料昔人
以公方漢之賈誼謂才本王佐學爲帝師豈虛也哉公爲
相不滿三載又爲僉壬忌嫉任用不專其專任得君之時

反在倉皇戎馬之際方其奉天出狩言聽計從一旦相失
帝爲驚泣任之如此其重也及乎大難旣夷柄用未久疑
貳滋生瀕於死地棄之如此其輕也然而任之則安棄之
則危遇與不遇唐之興衰係焉於公何加損哉公之事跡
載新舊唐書然年月時事新書頗略舊史爲詳茲特排比
紀年備載論議分綴下方以諗後之讀公集者

唐元宗天寶十三載甲午 一歲 舊書本傳字敬輿蘇

州嘉興人父偁溧陽令 權德輿序吳郡蘇人

天寶十四載乙未 二歲 舊傳少孤特立不羣頗勤儒學

肅宗至德元載丙申 三歲

至德二載丁酉 四歲

乾元元年戊戌 五歲

乾元二年己亥 六歲

上元元年庚子 七歲

上元二年辛丑 八歲

寶應元年壬寅 九歲

代宗廣德元年癸卯 十歲

廣德二年甲辰 十一歲 二月立雍王适為皇太子

永泰元年乙巳 十二歲

大歷元年丙午 十三歲

大歷二年丁未 十四歲

大歷三年戊申 十五歲

大歷四年己酉 十六歲

大歷五年庚戌 十七歲

大歷六年辛亥 十八歲 舊傳年十八登進士第以博

學宏辭登科授華州鄭縣尉語林仕江淮尉題廳云繞

階流瀾瀾來砌樹陰陰

大歷七年壬子 十九歲 盧龍將吏殺其節度使希彩

以衙將朱泚代之

大歷八年癸丑 二十歲 夏城奉天以備蕃寇

大歷九年甲寅 二十一歲

大歷十年乙卯 二十二歲 朱泚入朝因請留防秋以其弟滔代之朱泚出屯奉天

大歷十一年丙辰 二十三歲 舊傳罷秩東歸省母路由壽州刺史張鎰有時名贄往謁之鎰初不甚知留三日再見與語遂大稱賞請結忘年之契及辭遺贄錢百萬曰願備太夫人一日之膳贄不納唯受新茶一串而已又以書判拔萃選授渭南縣主簿遷監察御史 案舊書張鎰傳李靈耀反於汴州加侍御史汧淮鎮守使尋遷壽州刺史使如故本紀靈耀反在大歷十一年是

年鎰刺壽州宣公往謁當在此時

大歷十二年丁巳 二十四歲

大歷十三年戊午 二十五歲

大歷十四年己未 二十六歲 夏五月辛酉帝崩太子適卽位

德宗建中元年庚申 二十七歲 以朱泚爲涇原節度使築奉天城術士桑道茂言陛下不出數年暫有離宮之厄臣望奉天有天子氣宜高大其城以備非常 權德輿序由祠部員外轉考功郎中 舊傳德宗在東宮時素知贄名乃召爲翰林學士轉祠部員外郎贄性忠

蓋既居近密感人主重知思有以效報故政或有缺巨細必陳繇是顧待益厚又云贄初入翰林特承德宗異顧歌詩戲狎朝夕陪遊 新書德宗立遣黜陟使庾何等十一人行天下贄說使者請以五術省風俗八計聽吏治三科登僑父四賦經財實六德保罷察五要簡官事五術曰聽謠誦審其哀樂納市賈觀其好惡訊簿書考其爭訟覽車服等其儉奢省作業察其趣舍八計曰視戶口豐耗以稽撫字視墾田盈縮以稽本末視賦役薄厚以稽廉旨視按藉煩簡以稽聽斷視囚繫盈虛以稽決滯視姦盜有無以稽禁禦視選舉衆寡以稽風化

視學校興廢以稽教導三科曰茂異賢良幹蠱四賦曰閱稼以奠稅度產以衰征料丁壯以計庸占商賈以均利六德曰敬老慈幼救疾恤孤賑貧窮任失業五要曰廢兵之冗食蠲法之撓人省官之不急去物之無用罷事之非要時皆躋其言

建中二年辛酉 二十八歲 夏汾陽忠武王郭子儀薨
平章事盧杞譖左僕射楊炎賜死 加李希烈同平章事 十一月冊蜀王妃文冊杞王妃文

建中三年壬戌 二十九歲 朱滔敗李惟岳於東麓惟岳將王武俊殺惟岳以降 馬燧敗田悅於洹水遂圍

魏州 朱滔王武俊反發兵救田悅寇趙州詔李懷光討之 詔朱泚入朝以張鎰爲鳳翔節度使 詔李希烈討李納希烈潛與賊通 滔悅武俊納希烈皆稱王 李希烈自稱天下都元帥

建中四年癸亥 三十歲 春李希烈陷汝州詔遣顏真卿宣慰之 夏初稅間架除陌錢法冬十月涇原兵作亂入京城上幸奉天亂兵立朱泚爲秦帝尋改國號漢 鳳翔將李楚琳殺其帥張鎰 朱泚攻奉天都虞候渾瑊禦之朔方帥李懷光破賊於醴泉泚乃退 貶盧杞爲新州司馬 李希烈陷襄城取汴宋 司農卿段

秀實謀誅朱泚不克死 將軍高重捷及泚兵戰死 以蕭復劉從一姜公輔同平章事 舊傳朱泚謀逆從駕幸天時天下叛亂機務填委徵發指蹤千端萬緒一日之內詔書數百贊揮翰起草思如泉注初若不經思慮旣成之後莫不曲盡事情中於機會胥吏簡札不暇同舍皆伏其能轉考功郎中依前充職嘗啟德宗曰今盜徧天下輿駕播遷陛下宜痛自引過以感動人心昔成湯以罪已勃興楚昭以善言復國陛下誠能不悛改過以言謝天下使書詔無忌臣雖愚陋可以仰副聖情庶令反側之徒革心向化故奉天所下書詔雖武夫悍

卒無不揮涕感激多贄所爲也又云及出居艱阻之中雖有宰臣而謀猷參決多出於贄故當時目爲內相權德輿序公自行在帶本職拜諫議大夫中書舍人精敏小心未嘗有過艱難扈從行在輒隨啟沃謀猷特所親信有時讌語不以公卿指名但呼陸九而已初幸梁洋棧道危狹從官前後相失上夜次山館召公不至泣然號於禁旅曰得陸贄者賞千金頃之公至太子親王皆賀十一月二十三日賜將士名奉天定難功臣詔蕭復劉從一姜公輔平章事制案新紀在是年十月丁巳 普王荆襄江西道馬兵都元帥制案新紀建中

四年舒王謨爲荆襄江西沔鄂節度諸軍行營兵馬都元帥徙封普王 渾瑊京畿金商節度使制新書瑊傳帝狩奉天授行在都虞候京畿渭北節度使 慰問四鎮北庭將吏敕書近以賊臣朱泚背恩驚犯宮闕贄普又遣師旅助討姦凶遣太常少卿沈房宣諭案新書吐蕃傳朱泚之亂吐蕃請助討賊詔太常少卿沈房爲安西北庭宣慰使 論兩河及淮西利害狀新書本傳會馬燧討賊河北久不決請濟師李希烈寇襄城詔問策安出贄言云云通鑑時兩河用兵久不決賦役日滋贄以兵窮民困恐生內變乃上奏 論關中事宜狀通鑑

論關中形勢上不能用 論敘遷幸之由狀奉天論奏
當今所切務狀奉天論前所答奏未施行狀 奉天請
數對羣臣兼許令論事狀通鑑贄以人君臨下以誠信
爲本當優容以開言路乃上疏 奉天論尊號加字狀
舊書其年冬議欲以新歲改元而卜祝之流皆以國家
數鍾百六凡事宜有變革上謂贄曰往年羣臣請上尊
號聖神文武四字衆欲朕舊號之中更加一兩字贄奏
尊號本非古制 重論尊號狀新書帝言當小有變革
贄上言 奉天論赦書事條狀新書會興元赦令方具
帝以稿付贄使商討其詳贄上狀 奉天論擬與翰林
學士改轉狀 奉天請罷瓊林大盈二庫狀新書時貢
奉稍至行在置夾廡署瓊林大盈二庫別藏貢物贄諫
帝悟卽撤其署 奉天薦袁高等狀薦高及楊頊裴諝
孫咸周皓裴胄崔造殷亮李舟何士幹姚南仲陸淳沈
旣濟等

興元元年甲子 三十一歲 贈段秀實大尉諡忠烈

王武俊田悅李納上表謝罪 加李懷光太尉賜鐵券
懷光叛與朱泚合 二月丁卯上幸梁州 夏田承嗣
子緒殺田悅而代之 王武俊等去王號與昭義李抱
眞及馬燧擊破朱滔於涇城 六月神策將李晟克長

安收復京師朱泚走死涇州 秋七月車駕還長安
李希烈稱大楚皇帝殺宣慰使顏真卿 舊紀十二月
辛卯以諫議大夫陸贄爲中書舍人依前翰林學士
舊傳二月從幸梁州轉諫議大夫依前充學士德宗還
京轉中書舍人學士如故初贄受張鎰知得居內職及
鎰爲盧杞所排贄常憂惴及杞敗黜始敢上書言事德
宗好文益深顧遇奉天解圍後德宗言及違離宗廟嗚
咽流涕曰致寇之由實朕之過上欲掩杞之失贄又極
言杞等罪狀上雖貌從心頗不悅贄爲朋黨所擠同職
害其能加以言事激切動失上之歡心故久之不爲輔

相其於議論應對明練理體敷陳剖判下筆如神當時
名流無不推挹 通鑑上遣贄詣懷光營宣慰因召李
晟參議其事懷光意欲晟自乞減損沮敗其功乃曰將
士戰鬪同而糧賜異何以使之協力贄未有言數顧晟
晟曰公爲元帥得專號令晟將一軍受指蹤而已至於
增減衣食公當裁之懷光默然遂止上遣吐蕃發兵蕃
相言制書無懷光署名故不敢進上命贄諭懷光懷光
固執以爲不可 奉天改元大赦制平朱泚後正月癸
酉朔上在奉天改建中五年爲興元元年 車駕還京
大赦制重優復興元府及洋鳳等州詔新紀給復洋州

加給興元一年免鳳州今歲稅議減鹽價詔案玉海德宗召中書度支議減鹽價改梁州爲興元府升洋州爲望州詔新紀是年以梁州爲興元府給復一年耆老加版授奉天遣使宣慰諸道詔遣蕭復新紀是年正月戊子蕭復爲山東西荆湖淮南江西鄂岳浙江東西福建嶺南宣慰安撫使詔云朕自嗣位迄今六年德宗以大歷十四年五月卽位於今六年收復京師遣使宣慰將吏百姓詔云介于梁岷是年上幸梁州平淮西後宴賞諸軍將士放歸本道詔同中書門下平章事李抱真韓滉等案滉同平章事在是年十一月授王

武俊李抱真官封并招諭朱滔通鑑是年加王武俊同平章事抱真武俊約爲兄弟誓同滅賊招諭淮西將吏詔稱賊臣希烈僭竊又言念忠良銜冤沒代案是年希烈稱帝殺顏魯公招諭河中詔頃以懷光背恩自生猜阻案是年懷光叛安撫淮西歸順將士百姓勅李希烈首亂淮瀆又侵滎汴案去年希烈取汴宋甄獎陷賊守節官詔去年十月三日職官陷賊案去年十月戊申朱泚反令百寮議大禮期日詔朕自遷越旋於京師是在車駕還京之後不許諸軍侵擾勅李希烈阻兵淮右慮害烝人放淮西生口歸本貫勅李希

烈作亂以來擒獲淮西生口一切釋放歸本道 荅宰
臣請停大禮表朕失德致寇再經播越再新景命祇復
皇都又荅百寮請停大禮表又荅百寮請停大禮第二
表云播越三時久虧禋祀之禮旋歸半載未申告謝之
誠荅百寮請停大禮第三表俱在還京之後 李晟司
徒兼中書令制新書晟兼中書令在是年六月己酉
渾瑊侍中制新書瑊爲侍中在是年六月甲寅 盧翰
劉從一門下中書侍郎平章事制案新紀是年正月丙
戌吏部侍郎盧翰爲兵部侍郎同中書門下平章事
李納檢校右僕射平章事李納檢校司空制通鑑加平

盧節度使李納同平章事在是年 韓滉檢校左僕射
平章事制韓滉加檢校右僕射制通鑑加韓滉平章事
江淮轉運使在是年十一月 姜公輔左庶子制新書
宰相表是年四月甲寅公輔罷爲左庶子 馬燧渾瑊
副元帥招討河中制新紀是年馬燧爲慈隰諸軍行營
兵馬副元帥渾瑊爲河中絳陝虢諸軍行營兵馬副元
帥 李晟鳳翔隴西節度兼涇原副元帥制新書是年
八月癸卯李晟爲鳳翔隴右諸軍涇原四鎮北庭行營
兵馬副元帥 劉洽檢校司空充諸道兵馬都統制通
鑑加宣武節度使劉洽同平章事在是年 杜亞淮南

節度使制新書亞傳興元初入遷刑部侍郎又拜淮南節度使 賜李納王武俊等鐵券文正月二日 與回紇可汗書言賊臣尋已誅夷是在平朱泚之後 嘉王橫海軍節度使制案舊書嘉王運代宗子大歷十年封嘉王通鑑貞元元年以橫海軍使程日華為節度使日華子懷直亦為橫海軍節度此在其先當興元之初年奉天論解蕭復狀通鑑在是年 奉天論李晟所管兵馬狀新書李懷光有異志李晟密言其變因請移屯贄上奏勸帝許晟移軍 奉天奏李建徽楊惠元兩節度兵馬狀舊書李晟移軍東渭橋建徽惠元猶在咸陽贄慮懷光併建徽等軍又奏 駕幸梁州論進獻瓜果者上欲以散試官授之贄上奏 興元論解姜公輔狀通鑑上欲為唐安公主造塔葬之公輔表諫上怒贄上奏 又荅論姜公輔狀 興元論請優獎曲環所領將士狀 興元論解蕭復狀又荅論蕭復狀 興元論續從賊中赴行在官等狀通鑑時有涉遠來赴行在 頗猜慮贄奏以為不可 興元賀吐蕃尙結贊抽軍迴歸狀通鑑上欲倚吐蕃復京城聞其去頗憂之贄以為吐蕃貪狡引去實為可賀乃上奏 興元奏請許渾瑊李晟等諸軍兵馬自取機便狀通鑑上議晟瑊諸軍規畫

進取贄上奏 興元請撫循李楚琳狀通鑑楚琳除鳳翔節度使上心惡之畱楚琳使者不遣贄上奏 興元論中官及朝官賜名定難功臣狀 興元論賜渾瑊詔書爲取散失內人等議狀通鑑上令贄草詔賜瑊使訪求奉天所失裏頭內人贄上奏 鑾駕將還宮闕論發日狀 請釋趙貴先罪狀 論替換李楚琳狀通鑑上以鳳翔迎駕諸軍形勢甚盛欲遣人代楚琳贄論奏 貞元元年乙丑 三十二歲 春贈顏真卿司徒謚文忠希烈陷鄧州 夏朱滔卒以其將劉怱代之怱尋卒子濟復代之 上又欲赦懷光馬燧固爭請一月平之秋

懷光爲其下所殺 舊傳貞元初李抱真入朝從容奏曰陛下幸奉天山南時赦書至山東宣諭之時士卒無不感泣臣卽時見人情如此知賊不足平也 貞元改元大赦制舊紀正月丁酉朔大赦改元 十一月冬至大禮大赦制 蝗蟲避正殿降免囚徒德音新紀是年八月甲子以旱避正殿減膳 誅李懷光後原宥河中將吏并招諭淮西詔 六月冊嘉誠公主文 十一月告謝昊天上帝冊文 告謝元宗廟文 告謝肅宗廟文 告謝代宗廟文 祭大禹廟文 策問賢良方正文 能極言直諫科策問博通墳典達於教化科云朕獲主

神器七年於茲案帝以大歷已未卽位故云七年又策問識洞韜略堪任將帥科舊紀貞元元年上御正殿策賢良方正能極言直諫等三科舉人 荅百寮賀利州連理木荅宰臣請復御膳表又荅百寮請復御膳表案是年正月詔減御膳 張延賞中書侍郎平章事制新紀是年六月辛卯劍南西川節度使爲中書侍郎同中書門下平章事 賈耽東都畱守制舊紀是年六月壬午以工部尚書賈耽兼御史大夫東都畱守 收河中後請罷兵狀通鑑贄以河中旣平慮有希旨生事請乘勝討淮西兵連禍結賦役繁興遂上奏狀

貞元二年丙寅 三十三歲 春以劉滋崔造齊映同平章事 夏淮西將陳仙奇斬李希烈以降別將吳少誠復殺仙奇 誅李希烈後原淮西將士并授陳仙奇節度使詔重原宥淮西將士詔 賑恤諸道將吏百姓等詔 優恤畿內百姓并除十縣令詔云每日所進膳各減一半新紀貞元二年詔減御膳之半 賜京畿及同華等州百姓種子賑給貧人詔云春陽布和案上年冬至詔今年蝗旱損甚開春之後量給種子使就農功則此詔定在二年春 令諸道募靈武鎮守人詔吐蕃負恩背盟新紀是年吐蕃入寇 十一月冊淑妃王氏爲

皇后文 劉滋崔造齊映平章事制 李勉太子太師
 制新書李勉傳勉以檢校司徒平章事居相二載辭位
 以太子太師罷 崔造右庶子制通鑑是年十二月庚
 申崔造罷為右庶子 盧翰太子賓客制新書宰相表
 是年正月壬寅盧翰罷為太子賓客 崔縱東都留守
 制舊紀是年九月戊戌以吏部侍郎崔縱檢校禮部尚
 書東都留守 虔王申光隨蔡等州節度使制新書虔
 王諒傳是年領蔡州節度等使 韓滉度支鹽鐵轉運
 使制通鑑是年十二月丁巳以滉兼度支諸道鹽鐵轉
 運等使 李叔明右僕射制充劍南東川節度副大使

知節度事舊紀是年以劍南東川節度使李叔明為太
 子太傅 唐朝臣振武節度論惟明鄜坊觀察使制舊
 紀是年七月戊午以鄜坊節度唐朝臣為單于大都護
 振武綏銀節度使右金吾大將軍論惟明為鄜州刺史
 鄜坊都防禦觀察使 李澄贈司空制新書澄傳是年
 卒贈司空 賜安西管內黃姓燾官鐵券文八月三日
 除鄧州歸順官制迫以凶威陷於寇境案上年春李
 希烈陷鄧州是年希烈既誅除獻款投誠歸順者故有
 此制 賜吐蕃將書遣倉部郎中兼侍御史趙聿並令
 趙聿口宣尚結贊又賜吐蕃宰相尚結贊書賜尚結贊

第二書賜尙結贊第三書案舊書吐蕃傳貞元二年命倉部郎中兼侍御史趙聿爲入吐蕃使

貞元三年丁卯 三十四歲 以李泌同平章事 馬燧李臯實封制舊紀是年以荆南節度使曹王臯爲山南東道節度使六月丙戌以檢校司徒侍中馬燧爲司徒兼侍中 舊傳時贄母韋氏在江東上遣中使迎至京師搢紳榮之俄丁母憂東歸洛陽寓居嵩山豐樂寺藩鎮賻贈及別陳餉遺一無所取與韋臯布衣時相善唯西川致遺奏而受之贄父初葬蘇州至是欲合葬上遣中使護其柩車至洛其禮遇如此案公免喪後除官在貞元六年初故知丁母憂約在三年也

貞元四年戊辰 三十五歲 六月徵處士陽城爲諫議大夫

貞元五年己巳 三十六歲 春以董晉竇參同平章事貞元六年庚午 三十七歲 舊紀二月丙戌以中書舍人陸贄權兵部侍郎 舊傳免喪權知兵部侍郎依前充學士申謝日贄伏地而泣德宗爲之改容敘慰恩遇旣隆中外屬意爲輔弼而宰相竇參素忌贄贄亦短參之所爲言參贄貨由是與參不平

貞元七年辛未 三十八歲 舊傳七年罷學士正拜兵

部侍郎知貢舉時崔元翰梁肅文藝冠時贄輸心於肅肅與元翰推薦藝實之士昇第之日雖衆望不愜然一歲選士纔十四五數年之內居臺省清近者十餘人新書歐陽詹傳舉進士與韓愈李觀李絳崔羣王涯馮宿庾承宣聯第皆天下選時稱龍虎榜又崔羣傳未冠舉進士陸贄主貢舉梁肅薦有公輔才擢甲科韓愈與祠部陸員外書往者陸相公司貢士考文章甚詳愈時亦幸在得中其後一二所與及第者皆赫然有聲原其所以亦由梁補闕肅王郎中礎佐之梁舉八人無有失者其餘則王皆與謀焉陸相之考文章甚詳也待梁

與王如此不疑也梁與王舉人如此之當也至今以爲美談案試題明水賦得進士韓愈等二十三人舊傳旣與二吳不協漸加浸潤恩禮稍薄及通元敗上知誣罔遂復見用權德輿序翰林學士吳通元每切中傷陰結延齡互言公短新書吳通元傳與弟通微見贄驟擢頗媚恨贄自恃勁正屢短通元於帝卽建言承平時工藝書畫之冗皆待詔翰林而無學士至德以來命集賢學士入禁中草書詔今四方無事制書宜歸中書舍人請罷學士帝不許貞元七年通元拜諫議大夫大怨望贄與竇參交惡參從子申從舅嗣虢王則之共危

贄則之飛謗云贄試進士受賄謝帝惡誣構大怒罷參
宰相逐則之通元贄遂相矣

貞元八年壬申 三十九歲 春汴宋帥劉元佐卒軍中
立其子士寧 夏賜諫議大夫吳通元死貶竇參爲郴
州別駕 舊書四月乙未以尙書左丞趙憬兵部侍郎
陸贄爲中書侍郎同中書門下平章事 舊傳贄久爲
邪黨所擠因而得位意在不負恩獎悉心報國以天下
事爲已任上卽位之初用楊炎盧杞秉政樹立朋黨排
擯良善卒致天下沸騰鑾輿奔播懲是之失貞元已後
雖立輔臣至於小官除擬上必再三詳問久之方下及

贄知政事請許臺省長官自薦屬官 請許臺省長官
舉薦屬吏狀新書贄秉政始請臺閣長官得自薦其屬
有不職坐舉者帝初許之或言諸司所引皆親黨招賂
遺無實才帝復詔宰相自擇贄奏言 請遣使臣宣撫
諸道遭水州縣狀通鑑河南北江淮荆襄陳許等四十
餘州大水溺死者二萬餘人贄請遣使賑撫 論淮西
管內水損處請同諸道遣宣慰使狀 論嶺南請於安
南置市舶使狀通鑑嶺南節度使奏海舶珍異多就安
南市易欲遣判官就安南收市乞命中使贄上言 論
宣令除裴延齡度支使狀通鑑上欲用司農少卿裴延

陸宣公年譜
齡爲度支贄謂延齡誕妄小人用之駭物聽上不從
請減京東水運收腳價於緣邊州鎮儲蓄軍糧事宜狀
通鑑贄上言以邊儲不贍由於措置失當蓄斂乖宜
論齊映齊抗官狀舊紀八年以齊抗爲潭州刺史湖南
觀察使齊映爲洪州刺史江西觀察使 權德輿序公
以少年入侍內殿特蒙知遇不可與衆浮沉苟且自愛
事有不可必諍之上察物太精躬臨庶政失其大體動
與公違姦諛從而間之屢至不悅親友或規之公曰吾
上不負天子下不負吾所學不恤其他公精於吏事斟酌
剖決不爽錙銖其經綸制度具在德宗實錄 韓愈

順宗實錄八年春平章事始令吏部每年集選人舊事
吏部每年集人其後遂三年一置選選人猥至文書多
不了尋勘真僞紛雜吏因得大爲姦巧選士一蹉跌或
至十年不得官而官之闕者或累歲無人贄令吏部分
內外官員爲三分計闕集人以爲常其弊十去七八天
下稱之

貞元九年癸酉 四十歲 舊紀故事宰相秉筆決事每
人十日一易至是賈耽趙憬陸贄盧邁同平章政事百
寮有所關白更相讓而不言始詔定旬日秉筆後詔每
日更秉筆 十一月冬至大禮大赦制 謝密旨因論

所宣事狀通鑑上諭贄要重之事勿對趙憬陳論當密封手疏苗粲兄弟宜改外官又卿清慎太過諸道饋遺受亦無傷贄上奏 論緣邊守備事宜狀通鑑贄上奏論備邊六失以爲措置乖方課責虧度財匱於兵衆力分於將多怨生於不均機失於遙制 商量處置寶參事體狀通鑑上怒欲殺寶參贄上奏以爲參罪不至死且朝廷大臣不可誅之無名又奏議寶參等官狀請不簿錄寶參莊宅狀 請依京兆所請折納事狀 論度支令京兆府折稅市草事狀 議汴州逐劉士寧事狀 請不與李萬榮汴州節度使狀通鑑上議李萬榮逐

劉士寧除一親王充節度使令萬榮知留後贄復上奏請還田緒所寄撰碑文馬絹狀節度使田緒送馬一匹絹二千匹先奉旨爲其亡父承嗣撰遺愛碑文贄以承嗣阻兵犯命靡惡不爲請還馬絹以卻之

貞元十年甲戌 四十一歲 論左降官準赦合量移劄子再奏量移官狀三進量移官狀通鑑贄以郊禮赦下已近半年而竄謫者尙未霑恩乃爲三狀擬進 請邊城貯備米粟等狀去歲版築五原大興師旅案舊紀貞元九年築鹽州城鹽州卽五原見新書地理志 論裴延齡姦蠹書通鑑十一月壬申贄極陳延齡姦詐數其

罪惡書奏上不悅待延齡益厚 論朝官闕員及刺史
等改轉倫序狀 均節賦稅恤百姓凡六條第一條論
兩稅之弊須有釐革第二條請兩稅以布帛爲額不計
錢數第三條論長吏以增戶加稅闢田爲課績第四條
論兼并之家私斂重於公稅 舊傳十年十一月除太
子賓客罷知政事贄性畏慎及策免私居朝謁之外不
通賓客無所過從 韓愈順宗實錄宰相趙憬本贄所
引同對嫉贄之權密以贄彈事告延齡延齡益得以爲
計由是天子益信延齡而不直贄竟罷贄相以爲太子
賓客

貞元十一年乙亥 四十二歲 舊傳十一年春旱邊軍
芻粟不給具事論訴延齡言贄與張滂李充等搖動軍
情德宗怒將誅贄等四人會諫議大夫陽城等極言論
奏乃貶贄爲忠州別駕贄在忠州十年常閉關靜處人
不識其面復避謗不著書家居瘴鄉人多癘疫乃鈔撮
方書爲陸氏集驗方五十卷行於代後薛延爲忠州刺
史朝辭日德宗令宣旨慰安而韋臯累上表請以贄代
已

貞元十二年丙子 四十三歲

貞元十三年丁丑 四十四歲 司馬光稽古錄上自陸

贄罷相後事無大小皆自決之宰相奉行文書而已然
所詢謀倚信者皆纖邪之人裴延齡及京兆尹李實翰
林學士韋執誼等毀譽任情賞罰益紊焉又令中官掌
宮市強買人物京師苦之

貞元十四年戊寅 四十五歲

貞元十五年己卯 四十六歲

貞元十六年庚辰 四十七歲

貞元十七年辛巳 四十八歲

貞元十八年壬午 四十九歲

貞元十九年癸未 五十歲

貞元二十年甲申 五十一歲

順宗永貞元年乙酉 五十二歲 舊紀貞元二十一年

春正月癸巳上崩丙申發喪皇太子即位永貞元年

舊傳順宗即位與陽城鄭餘慶同詔徵還詔未至而贄

卒時年五十二贈兵部尚書諡曰宣子簡禮登進士第

累辟使府

江都薛壽同校字
儀徵劉毓崧

男壽祺校字



